

Kasih sayang pengubat gejala sosial remaja



BAHAYA DADAH ... Sharifah Hasidah menyaksikan pameran mengenai dadah semasa Program Sukarelaan 1 Tanggungjawab sempena Sambutan Peringatan Hari Antidadah Kebangsaan (HADAK) 2013, di Dewan Kampung Semariang Batu, di Kuching, semalam. • AWANG KUSHAIRY JUNAIDI

KUCHING, Sabtu — Perangkaan dan pengalaman Agensi Anti Dadah Kebangsaan (AADK) dalam menangani dadah di negara ini, mendapati bahawa gejala itu berlaku ekoran institusi keluarga yang semakin runtuh.

Pengarah AADK untuk negeri ini, Yap Chung Hong berkata, keruntuhan itu telah membawa banyak kesan kepada remaja

khasnya yang masih di bangku sekolah.

"Bertahun-tahun lamanya ketidaksempurnaan itu (keluarga) menjadi penyumbang utama masalah dadah. Kini, kita merayu kepada ibu bapa agar sentiasa menjaga keharmonianannya agar anak-anak ini dapat merasai kasih sayang," ujarnya pada majlis penutupan Program Sukarelaan 1

Tanggungjawab sempena Sambutan Peringatan Hari Anti Dadah Kebangsaan (HADAK) 2013, di Kampung Semariang Batu, di sini hari ini.

Turut hadir merasmikan penutupannya ialah Ahli Dewan Undangan Negeri (ADUN) Semariang, Sharifah Hasidah Sayeed Aman Ghazali.

Menurut Chung Hong, kasih sayang adalah diibaratkan pengubat kepada masalah itu justeru semua pihak harus menyedari hakikatnya pada peringkat awal.

"Masa untuk anak-anak memikirkan benda yang tidak baik boleh berkurangan selagi ibu bapanya tidak jemu mencurahkan kasih sayang.

Malahan, jika sudah merasainya sukar juga untuk kita melihat mereka melepak tanpa tujuan," katanya.

Sementara itu, peranan AADK kini dilihat

berbeza berbanding dulu. Jika sebelum ini ia hanya menangkap penagih dadah namun kini telah berubah sesuai dengan program transformasinya.

"Ya, mereka kini tidak lagi menggunakan pendekatan seperti itu bahkan telah mengadakan lebih banyak sesi perubatan serta kaunseling kepada penagih dadah.

Buktinya ia memiliki kira-kira 10 buah klinik Cure & Care (Malaysia) (C&C (Malaysia)), 52 buah Pusat Servis Cure & Care (CSC) dan 76 buah Pusat Komuniti Penyayang (CCH) di seluruh negara," kata Sharifah Hasidah pula.

Beliau mengharapkan, seiring dengan usaha yang dilakukan oleh AADK itu, masalah dadah akan dapat dikurangkan sekali gus tidak membebankan lagi remaja masa depan negara.